



Minggu, 29 Januari 2023
Ogen: Markus 1:40-42



"Malemlah Kam"



Jaman gundari enda melala kal turah pinakit. Baik pinakit pisik bage pe pinakit psikhis/jiwa. Penyebabna virus, bakteri bage pe cara rukur si kurang pas. Kerinana enda maba kendelen; la terjeng man si sakit ras keluarga si ndampingi/ngerawatsa. Pinakit kai gia, mereken ngaruh ku bas geluh penderita bage pe keluarga. Khususna man sakit si nggo ndekah, uga makana banci malem arah pinakit nari tentuna tambar segala tambar iusahaken nge guna idarami, dokter segala dokter (umum entah pe spesialis) idarami gelahna malem. Artina kerina upaya idalanken gelahna malem pinakit. Kalak si sakit gadamen si iceritaken bas ogenta enda, reh ndahi Jesus, nembah erjimpuh i lebe-lebe Jesus dengen mindo perkuah ateNa. Pemindon si sakit e me gelah ia datken kesehaten dengen malem arah pinakitna nari. Mekuah ate Jesus idudurkenNa tanNa janah ijemak Jesus kalak gadamen ndai jenari malem pinakitna dengen mejelis pe dagingna. Proses kalak gadamen ndai ndatken kesehatenna teridah erkiteken mekuah ate Jesus ras kalak si gadamen ndai pe nggit malem. Proses ndatken kesehaten teridah kiniteruken ukur rikut pe ras kiniteken/pengarapen kalak si sakit (bicara nggit Kam, ngasup kap Kam pepalem aku).

“Malemlah kam”, sada kalimat si mpeteneng ukur kalak si paksana rukur gulut erkiteken litna persoalen pinakit. Malemlah kam e me kalimat si ipedarat Jesus man kalak gadamen. Pengarapennta maka kalimat enda pe banci sialoken guna mabai geluhta sehat ras mejuah-juah, bagi kalak gadamen si ngaloken perkatan Jesus “nggit Aku, malemlah kam”.